

Īsā^(a.s) Ne Gunaahon Ko Maaf Kiyā Aur Beemaaron Ko Shifā Dī

Injeel : Luqaas 5:17-26

Ek din Īsā^(a.s) logon ko taaleem de rahe the aur wahaan par Fareesī aur Ibraanī qaanun ke ustaad bhī maujud the. Wo log Galeel ke har qasbe aur Yahudiyā aur Yerushalam se āe the. Allaah taa'alā kī taaqat Īsā^(a.s) ke paas thī jisse wo logon ko shifā dete the. ⁽¹⁷⁾ Kuch log ek beemaar ādmī ko chaṭaaī par uṭhā kar laae. Us ādmī ke pairon par faalij gir gayā thā. Wo us ādmī ko andar lā kar Īsā^(a.s) ke saamne liṭaanā chaah rahe the. ⁽¹⁸⁾ Lekin wahaan par logon kī bheed lagī huī thī, islie unko ghar ke andar jaane kī jagah naheen milī jahaan Īsā^(a.s) baithe hue the. Wo log us ādmī ko chat par le kar gae aur use upar se chaṭaaī ke saath neeche utaar diyā.

Is tarah se wo beemaar ādmī seedhā Īsā^(a.s) ke saamne pahunch gayā. ⁽¹⁹⁾ Tab Īsā^(a.s) un logon ke yaqeen ko dekh kar beemaar ādmī se bole, "Mere bhaaī, tumhaare gunaahon ko maaf kar diyā gayā hai." ⁽²⁰⁾

Ibraanī ustaad sochne lage, "Ye ādmī kaun hai? Ye Allaah taa'alā kī shaan me gustaakḥī kyun kar rahā hai? Sirf Allaah rabbul kareem hī gunaahon ko maaf kar saktā hai." ⁽²¹⁾

Lekin Īsā^(a.s) ye baat jaante the ki wo log kyā soch rahe haiñ. Unhone kahā, "Tum log apne āpse sawaal kyun karte ho? ⁽²²⁾ In do baaton me se āsaan kyā hai jo maiñ is beemaar ādmī se kahuñ, 'Tumhaare gunaahon ko maaf kar diyā gayā hai,' yā maiñ kahuñ, 'Uṭh kar khaḍe ho jao aur chalo phiro'?" ⁽²³⁾ Lekin maiñ tumko saabit kar saktā huñ kī is duniyā me insaan ke bete ke paas ye ikhtiyar hai kī wo logon ke gunaahon ko maaf kar saktā hai." Tab Īsā^(a.s) ne us beemaar ādmī se kahā, jo faalij kī wajah se hil bhī naheen saktā thā, "Maiñ tumse kahtā huñ, uṭh khaḍe ho! Apnī chaṭaaī uṭhaao aur apne ghar jao." ⁽²⁴⁾

Ye sun kar wo ādmī sabke saamne uṭh khaḍā huā. Usne apnī chaṭaaī ko uṭhaayā aur Allaah taa'alā kā shukr kartā huā apne ghar chalā gayā. ⁽²⁵⁾ Wahaan maujud saare log hairaan rah gae aur Allaah taa'alā kī hamd-o-sanā karne lage. Un logon ne baḍe ehateraam se kahā, "Āj hamne bahut hairaan kar dene waalī cheezen dekheen!" ⁽²⁶⁾